

Jangan adu semberono



Gambar fail, penguat kuasa KPDNHEP sentiasa melakukan pemantauan di seluruh negara. FOTO Arkib NSTP.

Baharom Bakar
am@hmetro.com.my

JANGAN buat aduan tidak berasas, sebaliknya masyarakat diminta menyalurkan maklumat lengkap bersama bukti sahih khususnya membabitkan peniaga menaikkan harga barangan.

Peringatan itu dikeluarkan Kementerian Perdagangan Dalam Negeri dan Hal Ehwal Pengguna bagi memastikan tiada pihak mengambil kesempatan dalam tempoh negara menghadapi wabak Covid-19.

Timbalan Menteri, Datuk Rosol Wahid berkata, aduan yang tidak tepat atau kurang jelas juga menyukarkan pihaknya untuk mengambil tindakan.

"Kita tidak menolak kemungkinan ada peniaga terutama di kawasan pedalaman yang mungkin mengambil kesempatan berikutan penularan wabak Covid-19 ini dengan menaikkan harga barang.

"Tetapi pengguna yang menyalur maklumat diharap memberi maklumat tepat dan lengkap, bukannya sebarang adu, bagi memastikan tindakan sewajarnya dapat diambil.

"Lengkap ini termasuk nama dan lokasi kedai selain butiran lain. Kerahsiaan pemberi maklumat dijamin," katanya ketika dihubungi, hari ini.

Ahli Parlimen Hulu Terengganu itu juga menerima aduan pengguna yang dihantar ke Facebook (FB) peribadinya, baru-baru ini mengenai sebuah kedai di Hulu Terengganu menjual gula pada harga RM3.80 sekilogram.

"Bagaimanapun, pengadu mendiamkan diri apabila saya minta maklumat lengkap kedai dan lokasi," katanya yang turut menggesa orang ramai tidak menggunakan laman sosial untuk berkongsi maklumat yang tidak tepat.

Menurutnya lagi KPDNHEP sentiasa melakukan pemantauan di seluruh negara bagi mengekang kegiatan pihak tidak bertanggungjawab sepanjang tempoh Perintah Kawalan Pergerakan.

Artikel ini disiarkan pada : Jumaat, 20 Mac 2020 @ 8:58 AM

